

Bi sutereren artean harrapatuta

Siriako Alepo hiria odolusten ari den bitartean, Babeserako Unitate Kurduak saiatzen ari dira erregimenaren eta matxinatuen arteko borrokaldiak Ashrafiyeh eta Shekih Masqsoud auzoetara ez daitezen iritsi; kurduak dira han gehiago. Kurduen milizietara Siriako Ejertzito Librearekin ernegaturik dauden arabiar gazteak iristen ari dira.

Testua eta argazkia:

| DAVID MESEGUER |



“Ikaslea naiz eta sekula ez nuen armarik hartu eskuan, baina orain herriak behar gaitu” dio Cihan-ek, kalashnikova sorbaldan daraman 20 urteko emakumeak.

BABESERAKO UNITATE KURDU-etako (YPG) bi miliziar guardia egiten ari dira Awaed meskitaren parean, Alepo osoa ikus daitekeen muinoan. Zerumugan milaka urteko zitadela ageri da, eta bertotik ke trinkoa dator, Bashar al-Assad-i leialak diren tropen eta Siriako Ejertzito Librearen arteko borrokaldien ondorioa. Egunez, hamarnaka lagun etortzen dira Sheikh Maq-

soud-eko anfiteatro natural honetara, gerra zuzenean ikusteko.

Joan den uztailetik Batasun Demokratikorako Alderdiak (PYD) –PKKren adar politikoa Sirian– herrialdearen iparraldeko hainbat gunek kontrolatu eta administratzen ditu, Siriako 2,5 milioi kurduen zati handi bat bizi da bertan. Alepoko Ashrafiyeh eta Sheikh Maqsoud ere bere esku daude.

Bitzita, bi sutereren artean

Neguaeren gogorrek eta elikagai eskasiak Alepoko milaka herritar bultzatu ditu egunero gerra fronteak gurutzatzera; bizia arriskuan jartzen dute hiriaren zati honetan lehengaiak eta gasolina lortzearen. Sheikh Maqsouden eta Ashrafiyehn denda gehienak irekita daude eta oinarritzko produktuak aurki daitezke bertan, izan ogia edo egurra,

herrialde osoan bezala prezioek gorakada itzela izan duten arren.

Alepoko infernuaren erdian halako oasia egoteak, eragin du hiriko beste auzoetatik egotzitako milaka lagun bertara joatea. Marian eta bere familiaren kasua hori da, orain Yasser-eko eskolan daude: “Ez dugu kalefakziorik eta negua gogorra izaten ari da”, dio zahartzarora hurbiltzen ari den emakumeak. Ikasmahaien orde, arropak, mantak eta kozinako tresnak ageri dira ikasgelan.

Hiriaren zati honetan borrokaldirik ez zen izan iazko urrira arte. Orduan, Babeserako Unitate Kurduak eta Siriako Ejertzito Librearen Saladino brigada gogor aritu ziren, matxinatuek Ashrafiyeh-en sartu nahi baitzuten. Borroketan 20 hildako izan ziren eta alde bakoitzak 200 preso inguru egin zituen; ez erasotzeko ituna sinatu ondoren presoak trukatu zituzten. “Ankarak ezin du jasan kurduak autonomia izaterik, ezta eskubiderik ere, eta horregatik kutsu islamiarra duten talde matxi-noak babesten ari da”, dio Hassanek, PYDko liderra Alepon.

Hainbat hilabete lasai igaro ondoren, tentsioa berriz itzuli da gune horretara, baina oraingoan miliziar kurduak Gobernuaren tropen kontra ari dira, hauek ere Ashrafiyeh-en sartu nahian baitabilta. Kurduak defentsarako postuak jarri dituzte eta garraibide nagusietan *checkpoint* ugari ere bai.

Emakume miliziarrek

YPGren barruan nagusi da PKKren ideologia eta Abdullah Öcalan-i sekulako miresmena zaio, miliziar

gehienak kurduak baitira. Baina maiz, beste erlijio eta jatorritako jendea ere aurki daiteke. Qamishlo hirian adibidez, borrokalari kristau ugari dago, eta Alepon arabiar gazte askok eman dute izena milizia kurduetan, Siriako Ejertzito Librearen jarraitzaileekin desengainatuta.

“Familia eta lagunak ez dira nitaz harro, nire burua saldu dudala uste dute” dio Mohammed-ek, milizia kurduetan izena eman duen gazte arabiarrek

“Familia eta lagunak ez dira nitaz harro. Traidore naizela uste dute, nire burua saldu dudala”, azaldu du Mohammed-ek YPGk Ashrafiyehen duen kuartel orokorrean. “Siriako Ejertzito Librea hasierako helburu nagusitik aldendu da: errejimenari aurre egitea. Zenbaitek, herritarrek lapurtu eta mehatxatzen dituzte. Euren borroka desitxuratu egin da”. Mohammedek matxinatuen taldea utzi zuen eta YPGra batu zen.

Antzeko kasua da Ahmed-ena, Saladino auzoko 20 urteko gaztea. Orain gutxi arte Al-Assad-en errejimenaren kontra ari zen: “Uztailean matxinada gure etxeko atarira iritsi zenean Ejertzito Librea batzea erabaki nuen. Lehen lerroan aukera gehiago izateko, familia ugari etxetik bota genituen eta horietako batzuk hil ere bai. Oso gogorra izan zen, batzuk umetatik ezagutzen nituen auzokoak ziren”. Miliziarra aurpegia *kufiyya* batek estalia duela

ari da kontatzen bere historia.

“Duela hilabete Ejertzito Librea uztea erabaki nuen eta Ashrafiyeh ezkutatu nintzen. YPGko hainbat kide ezagutu ondoren euren unitateetan sartzea pentsatu nuen. Onartua sentitzen naiz, ez dute etniaren araberrako banaketarik egiten, tratua berdina da”, dio borrokalariak.

Ehunka emakume bat egin dute euren borondatez milizia kurduekin. “Ikaslea naiz eta sekula ez nuen armarik hartu eskuan, baina orain herriak behar gaitu”, dio Cihan-ek, kalashnikova sorbaldan darman 20 urteko gazteak.

“Errejimenaren kontra berriki izan diren borrokalariak eta oposizio islamisten kontra lehenago izandakoek ekarri dute emakume ugari gurean izena ematea”. Alepoko PYDko buruzagietako bat da Zelal eta bere hitzek aldarrikapen kutsua dute: “Mendebaldeko Kurdistanen bi milioi kurdu besterik ez gara, eta egoeraren larritasuna ikusirik, oinarritzkoa da gu ere, emakumeok, babeserako unitateetan aritzea”.

Zelalen ustez “gizonek beti izan dute boterea eta hegemonia. Gerra ere bai. Emakumeek gerran parte hartzea berdintasun espresio gorena da”. Emakumeek bizitza politiko eta militar kurduan duten rol aktibo hori PKKren ideologia feministaren herentzia da. Ideologikoki gerrilla horrekin bat egiten duten talde politikoak zein armatuak paritatearen alde egiten saiatzen dira, eta goi-karguetan emakumeak ere badituzte. ■





irudimena

.com

Sormen lehiaketa | 3. edizioa



1 Soinu bat aukeratu
irudimena.com web orrian



2 Soinu bat, testu bat edo irudi bat sortu



3 Bidali!
irudimena.com gunetik

Sari frango irabazteko | Martxoaren 1etik maiatzaren 15era




